

Bosna i Hercegovina
Federacija Bosne i Hercegovine
Hercegovačko-neretvanska županija-kanton
SKUPŠTINA
Broj: 02-01-XXIX-318
Mostar, 22.12.2017. godine

IZVOD IZ ZAPISNIKA
sa dvadeset devete (XXIX.) sjednice Skupštine
Hercegovačko-neretvanske županije-kantona

Sjednica je održana dana 22.12.2017. godine u dvorani Skupštine Hercegovačko-neretvanske županije-kantona u Mostaru sa početkom rada u 10:00 sati.

Sjednicu je otvorio Šerif Špago, predsjedavajući Skupštine Hercegovačko-neretvanske županije-kantona i pozdravio nazočne.

Tajnik Skupštine, Željka Čule je izvršila prozivku nazočnosti zastupnika.

Nazočni: Stana Burić, Boris Bošnjak, Osman Ćatić, Ramiz Fajić, Luka Faletar, Zlatko Hadžiomerović, Zoran Krešić, Osman Macić, Tomislav Martinović, Zijat Mušić, Ante Pavličević, Davor Pehar, Andrea Pehar, Đuro Prkačin, Dario Pušić, Ivona Raguž, Zoran Raič, Vesna Saradžić, Amir Šelo, Ajman Šoše, Šerif Špago, Ana-Marija Tadić-Jakovljević, Drago Tule, Amer Zagorčić, Aner Žuljević, Mesud Džajić i Ilija Cvitanović.

Izočni: Anel Kljako, Elmir Šator i Adnan Velagić.

Konstatirano je da je na sjednici prisutno **27** zastupnika, te da postoji kvorum za rad i punovažno odlučivanje.

Nazočni po pozivu: predstavnici Vlade, predstavnici međunarodnih organizacija i predstavnici sredstava javnog informiranja.

Sjednica je javna, snimana je i snimci su sastavni dio ovog Izvoda iz zapisnika.

Predsjedavajući Skupštine obavijestio je zastupnike da je u materijalima dostavljen prijedlog dnevnog reda koji je utvrdio Kolegij Skupštine i to:

1. Zastupnička pitanja;
2. Prijedlog Zakona o ugostiteljskoj djelatnosti;
3. Prijedlog Zakona o zaštiti prirode;
4. Inicijativa za izmjene Zakona o sudskim pristojbama sa tarifom;
5. Mišljenje na Nacrt Zakona o liječenju neplodnosti biomedicinski potpomognutom oplodnjom;
6. Mišljenje na Nacrt Zakona o kontroli i ograničenoj upotrebi duhana, duhanskih i ostalih proizvoda za pušenje;
7. Mišljenje na Nacrt Zakona o mirnom rješavanju radnih sporova.

Otvorena je rasprava.

U raspravi su sudjelovali: Ilija Cvitanović, Aner Žuljević, Ajman Šoše, Amer Zagorčić, Đuro Prkačin, Šerif Špago i Ajdin Teletović.

Ilija Cvitanović je predložio da se sa dnevnog reda skine Zakon o zaštiti prirode.

Aner Žuljević je predložio dopunu dnevnog reda, i to amandmani na Ustav HNŽ/K u cilju usklađivanja Ustava HNŽ/K sa Ustavom F BiH i osiguranja konstitutivnosti srpskog naroda u HNŽ/K, i Odluku o proglašenju amandmana na Ustav HNŽ/K.

Ajman Šoše je obavjestio Skupštinu da je Ustavni sud prihvatio zahtjev 11 zastupnika za ocjenu ustavnosti članova Ustava HNŽ/K koji su obuhvaćeni uložnim amandmanima.

Usljediła je **stanka** od 15 minuta, radi usaglašavanja prijedloga o dopuni dnevnog reda. Usljedilo je glasanje prijedlozima za dopunu dnevnoga reda.

Prvi prijedlog zastupnika Ilije Cvitanovića, da se Prijedlog Zakona o zaštiti prirode skine s dnevnog reda.

Obavljeno je glasanje.

Nakon glasanja konstatirano je da prijedlog Ilije Cvitanovića nije dobio potrebnu većinu.

Drugi prijedlog zastupnika Anera Žuljevića po dopuni dnevnog reda jesu:

a) Amandmani na Ustav HNŽ/K-a i pod b) Odluka o proglašenju amandmana.

Obavljeno je glasanje.

Uz 3 glasa „Za“, prijedlog nije dobio potrebnu većinu.

Nakon toga obavljeno je glasanje o dnevnom redu.

Većinom glasova „Za“, i 3 glasa Protiv“ usvojen je slijedeći:

Dnevni red:

- 1. Zastupnička pitanja;**
- 2. Prijedlog Zakona o ugostiteljskoj djelatnosti;**
- 3. Prijedlog Zakona o zaštiti prirode;**
- 4. Inicijativa za izmjene Zakona o sudskim pristojbama sa tarifom;**
- 5. Mišljenje na Nacrt Zakona o liječenju neplodnosti biomedicinski potpomognutom oplodnjom;**
- 6. Mišljenje na Nacrt Zakona o kontroli i ograničenoj upotrebi duhana, duhanskih i ostalih proizvoda za pušenje;**
- 7. Mišljenje na Nacrt Zakona o mirnom rješavanju radnih sporova.**

Nakon usvajanja dnevnog reda, jednoglasno su usvojeni i izvodi iz zapisnika sa 6. i 8. izvanredne sjednice Skupštine HNŽ/K.

AD 1. Zastupnička pitanja

Otvorena je rasprava.

U raspravi su sudjelovali: Aner Žuljević, Amer Zagorčić, Tomislav Martinović, Zlatko Hadžimerović, Andrea Pehar, Vesna Saradžić, Ilija Cvitanović, Ramiz Fajić i Ajman Šoše.

Aner Žuljević

Zastupnik Aner Žuljević uputio je zastupničko pitanje prema Vladi HNŽ/K-a, gdje zahtjeva da mu se dostavi zapisnik bodovanja, zapisnik o radu komisije, to jest konkretno bodovanja kandidata prijavljenih na javni poziv Vlade, a vezano za obavljanje pripravničkog staža. Očekujem da isti sadrži pregled pitanja postavljenih u okviru intervju sa kandidatima, te konačni spisak sa bodovima svih prijavljenih kandidata. Znači ovdje naglašavam „svih prijavljenih kandidata“, a ne listu uspješnih koju smo imali, znači „svih prijavljenih kandidata“.

Amer Zagorčić

Moje prvo zastupničko pitanje. Molim da mi se dostavi struktura troškova za polaganje vozačkog ispita kategorije B, u smislu troškova po stavkama i ukupnih troškova, kao i da se dostavi koliko je svaki od članova tih komisija za polaganje vozačkog ispita naplatio u 2016. i 2017. godini. O čemu se radi? Radi se o tome da vozački ispit trenutno i u budućnosti će predstavljat potrebu, a ne luksuz, mi imamo stalno povećanje cijena vozačkog ispita, međutim ne rastu cijene goriva, vi si ni na jedan konkurs ne možete prijaviti ako nemate vozački ispit B kategorije i sa ovim značajno otežavamo, pogotovo mladim ljudima i konkuriranje na bilo koju vrstu posla jer jednostavno nemaju novac, a svaki dan je sve skuplje da polože vozački ispit, pa

u tom smislu molio bi da mi se dostavi struktura tih troškova, da vidimo šta to košta toliko, ide se prema 2.000 KM, da vidimo šta je to toliko što košta u tome toliko novca.

Moje drugo pitanje. Molio bi da dobijemo kompletan izvještaj o tome šta se dešava sa kupovinom zgrade za smještaj kantonalnih institucija, a pri tome mislim na pravna uporišta, finansijski aspekt, te pregovarački postupak ponude, kao i ulogu same Skupštine HNK-a, koja je čitajući sve ono u medijima što imamo priliku pročitati u potpunosti isključena, čak i iz informiranja o svemu tome, jer se informiramo putem medija, a Vlada se poziva po meni na vrlo sumnjive odluke, u suštini kao Skupština je dala suglasnost da Vlada vodi pregovore, međutim oni donose određene odluke, a da Skupština o tome nema pojma i da saznajemo iz medija.

Zlatko Hadžimerović

Evo nakon duže vremena došao sam u priliku da u redovnoj sjednici Skupštine podnesem jednu inicijativu, koja se odnosi na Vladu, Skupštinu i Fond za zaštitu okoliša HNŽ/K-a. Dakle, inicijativa za obezbjeđnje sredstava za pošumljavanje u HNŽ/K-a. „Poštovani, u svojstvu zastupnika u Skupštini HNŽ/K-a obraćam se Vladi, Skupštini i Fondu za zaštitu okoliša HNŽ/K-a i svim budžetskim korisnicima da podrže ovu inicijativu. Tužan kao i mnogi drugi stanovnici našeg kantona zbog masovnih požara koristim, odnosno predlažem sljedeće: da Vlada HNŽ/K-a predvidi rebalansom budžeta za 2017., molim vas malo pažnje jer je vrlo važno pitanje za sve nas i za naša buduća pokoljenja, i budžetom i za 2018. godinu, da izdvoji sumu od 500.000 KM za pošumljavanje izgorenih i drugih ranije ogoljenih površina, da Fond za zaštitu okoliša također predvidi stavke za iste namjene i da sve općine u HNŽ/K-a također planiraju sredstva za ovu akciju. Pošumljavanje bi vršili dobrovoljno svi uposlenici i korisnici budžeta HNŽ/K-a, učenici i uposleni u općinama. Pozvati sve uposlenike u HNK-a da svojim priložima u vidu jedne dnevnice pomognu ovu akciju. U suprotnom će Hercegovina za kratko vrijeme postati pustinja. Ova akcija je vezana i za druge grane, ekonomija, turizam, ekologija, poljoprivreda, a najveći utjecaj bi bio na klimu. Ovo je dakle svima poznata materija. Nadam se da će ova inicijativa naići na razumijevanje svih spomenutih faktora. Molim vas da pomognete da sačuvamo floru i faunu i našu županiju učinimo ljepšim za buduću generaciju.

Andrea Pehar

Upućujem inicijativu Ministarstvu unutarnjih poslova i Ministarstvu zdravstva, rada i socijalne skrbi. Dakle, podnosim inicijativu za iznalaženje rješenja za prosjačenje djece predškolske dobi. Apeliram na sve nadležne da zaštite tu dječicu i sklone ih s ulice. Zaista se stječe dojam nebrige i nemara nadležnih kada na ulici sretnete pretučeno modro dijete sa masnicama ispod oka i ispružene ruke a jedva zna i hodati.

Dalje imam pitanje Ministarstvu zdravstva, rada i socijalne skrbi. Koliki je broj registriranih domova za djecu bez adekvatne roditeljske skrbi i koliki je broj korisnika tih istih domova, te dali se domovi novčano pomažu od strane županije, i ako jesu i kojem iznosu?

Imam još jedno pitanje Ministarstvu prosvjete, znanosti, kulture i športa. Koji su kriteriji korišteni za raspodjelu sredstava za kulturu, ako su uopće dodjeljivana sredstva? Hvala.

Vesna Saradžić

U travnju ove godine tražila sam od nadležnih kantonalnih institucija poduzimanje preventivnih mjera zaštite od požara na otvorenom prostoru. Od Uprave za civilnu zaštitu i vatrogastvo HNŽ/K-a sam dobila iscrpnu informaciju o preporukama za provođenje preventivnih mjera zaštite i spašavanja u cilju smanjenja i ublažavanja rizika. Preporuke su detaljno razrađene i navedeni su nosioci aktivnosti. A na kraju ove godine na području HNŽ/K-a zvanično je registrirano 2.500 požara, najveći broj požara su posljedica ljudske

neodgovornosti, nepažnje i nažalost namjernog paljenja šume. Dali je Vlada, zajedno sa nadležnima, napravila analizu novonastalog stanja na područjima koja su bila obuhvaćena požarima? Postoji li izrađena studija o procjeni štete i koliki su financijski gubici? I šta se planira poduzeti i koji su daljnji koraci za saniranje postojećeg stanja? Ujedno predlažem da se u budžetu za 2018. godinu planiraju sredstva za nabavku sadnica kako bi se što skorije krenulo u plansko pošumljavanje opožarenih i opustošenih predjela.

Drugo, svjedoci smo, ovo je inicijativa, svjedoci smo da nam šume uslijed raznih štetnih faktora bukvalno nestaju pred očima, tome naveliko doprinosi nelegalna sjeća, odnosno krađa šume, nepostojanje zakona o šumama rapidno ubrzava ovaj proces. U zakonu o Vladi HNŽ/K-a, član 3, stav 2, definirano je da Vlada upravlja imovinom u vlasništvu kantona ako zakonom nije drugačije određeno. Shodno tome upućujem inicijativu prema Vladi HNŽ/K-a za uspostavu akcionog plana na sprječavanju nelegalne sječe drva na području HNŽ/K-a i ujedno tražim izvještaj o dosadašnjim poduzetim mjerama zaštite šuma u smislu kontrole prijevoza drvnih sortimenata i posjedovanja potrebne propisne dokumentacije o porijeklu i vlasništvu.

Ilja Cvitanović

Dakle, imam dva pitanja, jedno se odnosi na medije, a jedno na pripravnike. Nemojte mi zamjerit, ne odnosi se na vas, odnosi se na transparentnost. Dakle, na medije se odnosi, nisam uspio pročitati kolega Šelo u službenom listu analitiku kome su raspoređena sredstva za medije. Stoga žao mi je što nije tu premijer jer njemu upućujem pitanje, do dostavi i meni i svim ostalim zastupnicima točan iznos i ime i prezime medija koji je na osnovu javnog poziva ili kakvog već poziva, mislim da nije bio javni, dobio značajan iznos sredstava, a mislim da su prije nekoliko dana podijelili 300.000 KM. Podržavam podršku medijima s ciljem transparentnog i korektnog izvještavanja svih stanovnika u ovoj županiji, ali ne podržavam selektivno i stranačko dijeljenje novaca, stranačkim medijima, koji će praviti javno mnijenje onako kako komu odgovara. Budući da već nekoliko pitanja koja sam postavio nisam dobio na njih odgovore, tražim od ove Skupštine da pokaže i autoritet i da pokaže da ima nekakvu težinu, da oni koje smo mi izabrali i koji su nositelji izvršnih funkcija su dužni dati odgovore ma kako god se njima naša pitanja činila i neracionalna i nerazumna, imamo pravo na njih i očekujem od vas predsjedniče Skupštine da iskoristite i svoju poziciju i svoj autoritet da dobijemo odgovore na pitanja koja smo postavili. Dakle, ja ponavljam, da nisam dobio niti na jedno pitanje odgovor, izuzev Ministarstva poljoprivrede, od Vlade nisam dobio niti jedan odgovor.

Drugo pitanje se odnosi na pripravnike, na famozni natječaj koji je proveden za pripravnike. Tražim da nam se dostavi na uvid, ako već drugačije ne može, da vidimo koliko je utjecaja imao usmeni ispit na odbacivanje ili na odabir onih koji su primljeni ili onih koji nisu primljeni, da ostvare svoje prvo životno radno iskustvo. Dakle, što pitam? Tražim bodovanje prije usmenog ispita jer svi znamo čemu je služilo tih 30% ili 40% bodova na usmenom ispitu. Dakle, da vidimo koliko je to izmanipulirano i koliko je to bilo korektno.

Ramiz Fajić

Moje zastupničko pitanje se odnosi na Ministarstvo zdravstva, rada i socijalne zaštite HNŽ/K-a. Uvidom u strukturu izmjene i dopune Proračuna HNŽ/K-a za 2017. godinu uočio sam stavku „ustanova socijalne zaštite u Stocu“, tu je planirano na poziciji 160.000 KM za ustanovu. Dali je to Dom za socijalno i zdravstveno zbrinjavanje invalidnih osoba? Osnivač ustanove je Vlada HNŽ/K-a i ustanova je počela sa radom prije 4 godine, smješteno je oko 150 korisnika, cijena smještaja je za pokretne korisnike 33 KM po danu, za nepokretne korisnike 36 KM po danu, za one korisnike sa kojima se ne može uspostaviti kontakt 46 KM po danu. Kada se aproksimativno analizira prihod doma, što financira Vlada HNŽ/K-a kao osnivač, je cirka 1.800.000 KM, ovdje se pojavljuje višak prihoda nad rashodima, u što se ta sredstva ulažu, a za što se naknadno izdvaja 160.000 KM? Molim vas da mi dostavite podatke kako se formira

cijena smještaja, te tražim da mi se dostave podaci o utrošku sredstava iz budžeta HNŽ/K-a. Napomena, domovi za socijalno i zdravstveno zbrinjavanje invalidnih osoba u okruženju su preko 30% jeftiniji za iste ili bolje usluge. Molim da mi dostavite pisani odgovor.

Ajman Šoš

Ja ću zastupničko pitanje uputiti Ministarstvu unutrašnjih poslova, a glasi: U kojoj fazi je provedba presude kantonalnog suda u Mostaru vezano za nezakonito imenovanje komesara policije HNŽ/K-a, kada je presuda primljena i zašto do sada nezakonito imenovana osoba nije izvedena iz radnog odnosa, odnosno kakav je trenutno radno-pravni status navedene osobe? Zamolio bi pošto se ovdje radi zaista o jednom velikom problemu, koji nas direktno vodi u anarhiju, da mi se što prije odgovori, kako bismo znali imena odgovornih jer znate da je neizvršenje presuda krivično djelo.

Predsjedavajući Skupštine HNŽ/K Šerif Špago zaključuje raspravu po prvoj točki dnevnog reda.

AD 2. Prijedlog Zakona o ugostiteljskoj djelatnosti

Uvodno izlaganje dao je Ajdin Teletović, ministar trgovine, turizma i zaštite okoliša. Otvorena je rasprava.

U raspravi sudjelovali: Amer Zagorčić, Đuro Prkačin.

Zastupnik Amer Zagorčić ulaže slijedeće amandmane:

Amandman 1: da se u članku 9 nakon točke, u stavku 4, dodaje, „rješenje mora sadržavati mjeru obaveznog potpunog gašenja glazbe nakon 02 sata ukoliko se objekat nalazi u naselju“.

Amandman 2: Članak 10 „da ministar posebnim pravilnikom propisuje šta predstavlja uljudan, korektan i profesionalan odnos iz stavka 1, točka R“.

Amandman 3: „da ministar posebnim pravilnikom propisuje šta predstavlja postupanje s povećanom pažnjom prema pravilima struke i običajima pažnje dobrog stručnjaka iz stavka 1, točka S“.

Amandman 4: U članku 26, kaže „danom stupanja na izdržavanje kazne ako ugostitelj bude osuđen pravomoćnom presudom na kaznu zatvora dužu od 3 mjeseca“, dodati „ukoliko u roku od 15 dana od dana stupanja na izdržavanje kazne putem svog pravnog opunomoćenika ne ovlasti drugo lice kao odgovorno lice za upravljanje i vođenje objekta“.

Amandman 5: Odnosi se na privremene dozvole u članku 32 i 37, prijedlog je „da je krajnji datum 31.03.2018. godine“.

Amandman 6: Odnosi na članak 41, gdje se govori o ugostiteljskim uslugama u domaćinstvu i gdje kaže da je to ako ima najviše do 10 soba, odnosno 20 postelja, da se to smanji na „5 soba i broj postelja da se smanji na 10“.

Usljedila je stanka.

Nakon stanke u ime Vlade HNŽ/K ministar Teletović je da obrazloženje na uložene amandmane zastupnika Zagorčića, imajući u vidu da ih Vlada nije prihvatila.

Poslanik Zagorčić je odustao od izjašnjavanja po amandmanima.

Đuro Prkačin je u ime Kluba HDZ iznio određene prijedloge koji bi se trebali razmatrati kada dođe do usklađivanja ovog Zakona sa Federalnim koji je u proceduri, te iznio stav da će klub HDZ podržati prijedlog Zakona.

Obavljeno je glasanje o Prijedlogu Zakona o ugostiteljskoj djelatnosti.

Nakon glasanja konstatirano je da je većinom glasova „Za“, uz 2 glasa „Protiv“ usvojen Prijedlog Zakona o ugostiteljskoj djelatnosti.

AD 3. Prijedlog Zakona o zaštiti prirode

Uvodno izlaganje dao je Zejnil Trešnjo, pomoćnik ministra za zaštitu okoliša.

Otvorena je rasprava.

U raspravi su sudjelovali: Šerif Špago, Zijat Mušić.

Šerif Špago je uložio amandmane i to , u članku 10, stavak 1, riječ „prirodninama“ se mijenja riječima „prirodna dobra“. U članku 13, stavak 3, točka C, riječ „gljivljeg“ se mijenja riječima „svijeta gljiva“.

Zijat Mušić je uložio amandman:

„da se u članku 141 iza riječi „federalni propisi“ stavi tačka, a u riječi „ukoliko nisu suprotnosti sa onim Zakonom“ brišu.

Nakon rasprave, ministar Teletović Ajdin je u ime Vlade HNŽ/K obrazložio da su prihvaćeni uloženi amandmani.

Obavljeno je glasanje o Prijedlogu Zakona o zaštiti prirode.

Nakon glasanja konstatirano je da većinom glasova „Za“, i 4 „Suzdržana“ usvojen Prijedlog Zakona o zaštiti prirode.

AD 4. Inicijativa za izmjene Zakona o sudskim taksama sa tarifom

Uvodno izlaganje dala je gospođa Jasminka Bratić, Ministarstvo pravosuđa, uprave i lokalne samouprave.

Otvorena je rasprava.

U raspravi nije nitko sudjelovao.

Predsjedavajući Skupštine predložio je slijedeći Zaključak:

1) Skupština HNŽ/K prihvaća inicijativu Nezavisnog biroa za razvoj Gradačac-Modriča i Udruženja za poduzetništvo i posao „LINK“ Mostar za izmjenu Zakona o sudskim pristojbama s tarifom.

2) Zadužuje se Ministarstvo pravosuđa, uprave i lokalne samouprave i Vlada HNŽ/K da izrade nacrt Zakona o izmjenama Zakona o sudskim pristojbama s tarifom u skladu s prijedlogom i zaključkom Vlade HNŽ/K broj 01-1-02-2577/17 od 16.11.2017.godine i upute ga u skupštinsku proceduru.

3) Zaključak stupa na snagu danom donošenja, a objavit će se u Službenim novinama HNŽ/K.

Obavljeno je glasanje.

Nakon glasanja konstatirano je da je ovaj Zaključak jednoglasno usvojen.

AD 5. Mišljenje na Nacrt Zakona o liječenju neplodnosti biomedicinski potpomognutom oplodnjom

Uvodno izlaganje je dala gospođa Branka Bošković, pomoćnik ministra za zdravstvo u Vladi HNŽ/K-a.

Otvorena je rasprava.

U raspravi je sudjelovao Osman Ćatić.

Predsjedavajući Skupštine predložio je slijedeći Zaključak:

1) Skupština HNŽ/K daje pozitivno mišljenje na Nacrt Zakona o liječenju neplodnosti biomedicinski potpomognutom oplodnjom F BiH uz zahtjev da se uvažavaju mišljenja i prijedlozi sadržani u zaključku Vlade HNŽ/K broj 01-1-02-1890/17 od 31.08.2017. godine.

2) Zaključak Skupštine HNŽ/K sa zaključkom Vlade HNŽ/K iz točke 1 će se dostaviti Domu naroda parlamenta F BiH.

3) Zaključak stupa na snagu danom donošenja, a objavit će se u Službenim novinama HNŽ/K.

Obavljeno je glasanje.

Nakon glasanja konstatirano je da većinom glasova „Za“, i 1 glas „Protiv“ usvojen ovaj Zaključak.

AD 6. Mišljenje na Nacrt Zakona o kontroli i ograničenoj upotrebi duhana, duhanskih i ostalih proizvoda za pušenje

Uvodno izlaganje je dala Karmela Ivanković, županijski sanitarni inspektor u Ministarstva zdravstva, rada i socijalne zaštite.

Otvorena je rasprava.

U raspravi su sudjelovali: Zijat Mušić, Davor Pehar i Amer Zagorčić.

Predsjedavajući Skupštine HNŽ/K predložio je slijedeći Zaključak:

1) Skupština HNŽ/K daje pozitivno mišljenje na Nacrt Zakona o kontroli i ograničenoj upotrebi duhana, duhanskih i ostalih proizvoda za pušenje F BiH.

2) Zaključak Skupštine HNŽ/K sa zaključkom Vlade HNŽ/K broj 01-1-02-1891/17 od 31.08.2017. godine će se dostaviti Domu naroda Parlamenta F BiH.

3) Zaključak stupa na snagu danom donošenja, a objavit će se u Službenim novinama HNŽ/K.

Obavljeno je glasanje.

Nakon glasanja konstatirano je da uz 14 glasova „Za“, 6 „Protiv“, i 4 „Suzdržana“, usvojen ovaj Zaključak.

AD 7. Mišljenje na Nacrt Zakona o mirnom rješavanju radnih sporova

Uvodno izlaganje je dao Antonio Vujica, pomoćnik ministra za sektor rada.

Otvorena je rasprava.

U raspravi nije nitko sudjelovao.

Predsjedavajući Skupštine HNŽ/K predložio je slijedeći Zaključak:

1) Skupština HNŽ/K daje pozitivno mišljenje na Nacrt Zakona o mirnom rješavanju radnih sporova F BiH uz zahtjev da se uvažavaju mišljenja i prijedlozi sadržani u zaključku Vlade HNŽ/K broj 01-1-02-2230/17 od 11.10.2017. godine.

2) Zaključak Skupštine HNŽ/K sa zaključkom Vlade HNŽ/K iz tačke 1 će se dostaviti Federalnom ministarstvu rada i socijalne politike.

3) Zaključak stupa na snagu danom donošenja, a objavit će se u Službenim novinama HNŽ/K.

Nakon glasanja konstatirano je većinom glasova „Za“, i 2 glasa „Protiv“, usvojen ovaj Zaključak.

Predsjedavajući je zaključio 29. sjednicu Skupštine HNŽ/K.

Sjednica je završena u 15:30 sati.

Zapisničar

Dario Topić



Predsjedavajući

Šerif Špago